


KODAK Gray Scale

KODAK
LICENSED PRODUCT

M

G



南詔野史

ル 5
3130
2



九 5
3130
2

增訂南詔野史下卷

明四
川新都楊
慎升菴編輯

大清湖
南武陵胡
蔚羨門訂正

段氏總管除天定賢王興智起段信苴日即段實訖段

世共襲十二世段實名信日

段實於南宋理宗辛酉景定二年蒙古世祖之中統二年
入朝於世祖襲總管賜虎符 隕大理威楚鄯闡統矢會川
建昌騰越等城自萬戶以下 日受節制南宋理宗癸亥景
定四年為世祖中統四年蒙 日設大理都元帥府命昔撒

續和丁巳年
六月八日購求

昔總制鬼國大理兩路理宗子景定五年為世祖至元
 元年妖僧舍利威結威楚統六部聞及三十七蠻叛實
 討之大破於威楚統矢安賓處又破釋多羅十餘萬眾
 於洱河海口南宋度宗丁卯歲三年蒙古世祖至元四
 年以皇第五子忽哥赤為雲南工鎮大理至元五年忽哥
 赤受命與安南國王討占城其地南宋度宗咸淳六年世
 祖至元七年置大理路軍民總府南宋度宗辛未咸淳
 七年為蒙古世祖至元八年冬十一月世祖改國號曰元
 雲南王忽哥赤為元帥寶和丁所破元伐金齒縹甸降之

分大理三十七蠻部為南北中三區遣阿魯忒兒宣撫大
 理詔諭諸蠻南宋度宗甲戌咸淳十年元世祖至元十一
 年封宗室脫忽魯為雲南王命雲南行省平章政事賽典
 赤建雲南各衙門妖僧舍利威復叛實遣石買等詭為商
 賈執贄往見挺矛縱殺之梟首於市元世祖賜寶白金及
 金織紋衣南宋恭宗丙子德佑二年元世祖至元十三年
 授實為大理等處宣撫使緬甸緬甸犯永昌元命納速刺丁
 賽典赤之長子賽典赤之長子伐之破砦三百四天暑還師復命諸王相
 後封延安王後封延安王吾答兒右丞太卜泰政也罕的斤伐緬招討使怯烈先驅

造舟於阿若阿禾两江進拔江頭太公二城金齒烏蒙皆
降南宋帝昺庚辰祥興二年春二月爲元世祖忽必烈之
至元十七年宋亡元入主中國以忽哥赤之子也先帖木
兒爲雲南王命忙兀魯征八百媳婦緬敗忽都帖木兒兵
詔思播土官田楊二處兵助之命征緬官悉聽雲南王
節制至元辛巳十八年實率之阿慶入覲元祖嘉其忠晉
大理威楚金齒等處宣慰使元帥陞辭復拜爲雲南諸
路行中書省叅知政事留阿慶宿衛東宮至元壬午十九
年實受勅迎征緬師於金齒勅卒詔以其弟忠爲大理宣
慰使兼管軍民萬戶府贈實爲武定公實任職二十二年

段忠 實之弟

段忠元世祖癸未至元二十年襲是年忠隨元元帥濶木
征叻部兩林蠻及會川等處破賊立功元授忠爲鄯闡酋
賜虎符元置邦牙宣慰司於蒲甘城命雲南王也先帖木
兒率招討使怯烈總兵三千往鎮之忠奉雲南王命伐武
定冬十二月忠卒以實之子阿慶爲大理金齒等處宣慰
使都元帥佩金虎符封宣武將軍晉鎮國上將軍尙公主
遣歸復授雲南行省叅政忠任職一年

段慶即阿實之子

段慶元世祖甲申至元二十一年襲至元二十五年以雲南王也先帖木兒移鎮大理進封營王至元二十七年冬十月封皇孫甘刺麻為梁王鎮雲南至元二十九年改封梁王甘刺麻為晉王鎮北邊至元三十年封甘刺麻之子松山鎮雲南至元甲午三十一年世祖崩孫鐵木耳立是為成宗成宗丙申元貞二年置徹里路即車里軍民宣慰使司令與八百犬牙相制秋八百叛命也先不花征之成宗己亥大德三年雲南水西土官宋隆濟叛貴州知州張懷德戰死

雲南行省麻九兒討之追殺賊首撒月斬首五百級慶奉勅征交趾平之入朝帶僧左黎同往適成宗病手疽甚黎以法水洗之立愈帝欲試其術乃掘地窖令八人潛其中擊鼓佯云有怪召黎治之黎行法頃之不聞鼓聲啟窖視之則八人已死帝敬其法封為國師大德四年緬人僧哥倫作亂緬酋執其兄阿散哥也尋釋去阿散乃率其黨殺酋酋次子奔愬京師詔遣薛超兀兒率行省兵討之大德五年金齒八百叛不輸糧殺官吏元命右丞劉深哈刺帶鄭祐等征之劉深協求水西土婦節金三千兩馬三千匹

土官宋隆濟遂叛圍深等於窮谷中梁王濶閣率兵救解之冬雲南地大震御史陳天祥諫伐西南夷不報大德七年罷征八百免右丞劉深官收符印左丞相哈刺哈孫議深微名首釁喪師辱國勸帝誅深遂殺之深即往以兵偪南宋帝昺於謝女峽者大德八年立平雲南碑於點蒼山順元宣撫宋阿重獲其叛叔宋隆濟朝命陞職賜衣一襲滇池有蛟化少年淫婦女有神僧趙伽羅者命黑胡神擒之至暎水見形斬之神即土主也成宗丙午大德十年羅雄土官阿那龍少叛據越州今在曲靖府南六十里本唐之悅州其川名魯望命

右丞汪惟能討之追至曲靖斬那龍少是年慶卒弟正襲

慶任職四十三年

段正 慶之弟

段正元成宗丁未大德十一年襲正招蒙化山中生爨人籍元授正為泰政仍大理軍民總管晉甯建盤龍寺有神僧覺照者段氏族入號蓮峯遊東山見龍潭景絕幽勝乃咒龍令徙龍去水涸建寺其地蔚按蓮峯僧於順帝之至正末入定塔中武宗海山戊申至大元年霑益烏蒙地大震三日竝出至大二

年三月梁王松山有風疾詔封皇第七子西平王奧魯赤

南詔聖史 卷一
之孫老的代鎮雲南仁宗愛育黎拔力八達壬子皇慶元年詔罷征八百皇慶癸丑二年冬十月學士李孟奏准開科三年一試時九成殿生芝天下共取士三百名每榜雲南取五名內蒙古二名塞目二名漢人一名以八月二十日初場二十三日次場二十六日三場仁宗乙卯延祐二年十一月封武宗子和世珠爲周王出鎮雲南仁宗丙辰延祐三年正卒慶子隆襲正任職十年

段隆 慶之子

段隆元仁宗丁巳延祐四年襲元授隆爲大理軍民總管延祐己未六年雲南行省奏夷俗凡土官無子即以妻代管請聽之詔曰可延祐庚申七年封甘刺麻孫王禪爲雲南王英宗碩德八喇癸亥至治三年進封王禪爲梁王封其子帖木兒不花爲雲南王是年八月諸王按梯不花索羅月魯鐵木兒等及御史大夫鐵失弑帝於南坡行幄九月泰定帝也孫鐵木兒即位十二月流諸王月魯鐵木兒於雲南泰定四年洱河有水怪牛豬形短項金睛興水爲患大理一道人向隆取黃金百鎰隆與之乃以金爲索沉於河怪即日徙於浪穹甯河按六詔靈源記云甯河無底

明宣德間有漁人李應捕魚網得金索旋得旋斷一漁者
誠之曰可止矣應貪甚儘曳之索將窮驚其怪風浪陡作
應並舟俱溺至今爲患文宗圖帖睦爾庚午至順元年以
豫王阿忒思納失里出鎮雲南諸王禿堅據雲南叛殺廉
訪使自稱雲南王元詔樞密帖木兒討之發朵甘思等處
兵分道進至四川建昌羅羅斯權尋甸府官曲朮集義兵
討禿堅敗賊伯忽於馬龍追至金馬山擒之是年隆以老
退閒子俊襲隆任職十四年

段俊 隆之子

段俊元文宗辛未至順二年襲元授俊爲雲南行省平章
烏撒部奏雲南驛輸征甚苦願屬四川奏下泰政賈敦熙
議之是年俊卒族弟義襲俊任職一年

段義 俊之族弟

段義元文宗壬申至順三年襲朝命止授爲承務郎蒙化
州知州是年阿容禾叛於中慶路義助兵討平之以功陞
泰政九月烏蒙土官祿余寇順元雲南行省遣都事那海
奉詔往諭授余爲泰政冬十一月雲南行省奏國馬每月
上寅日給鹽飲之無病因伯忽叛鹽不給馬多死詔四川

以鹽給之是年義卒隆子光襲義任職一年

段光 隆之子

段光元順帝受權帖睦爾癸酉元統元年襲朝命止授爲承務郎蒙化州知州番兵作亂孟州判官李生等守白崖值高蓬新敗番兵乘勝長驅破河尾關光率兵大敗之斬馘無算河水盡赤爲之不流得戰馬甲仗數千光賦凱旋詩曰雨鎖金門百里城神州花木管絃聲齊天蒼嶽泰雲峻界地榆河射月明梵宇三千朝唄朗招提八百夜香清恒沙善果心無異何患愚夷治不平元統二年光以先與

梁王把匝剌瓦爾密孛羅因分域構隙至是遣張希矯楊生張連等發兵攻梁王不勝士卒多死希矯等遁歸順帝

至元元年梁王侵大理光自督兵與戰於昆彌山即今大理府趙

州南之定西嶺梁王大敗凱還侍翰楊天甫作長壽仙曲上光云

蒙氏鍾王氣駕馭萬乘唐南龍光對北金鎖東洱水朝西

點蒼四面固金湯江綠春楊柳岸清古雪霜屏障龍吟梅

破王竹林鶴立菊舒黃四季景如粧此生誠慶幸有眼睹

明王光大喜設宴謝之順帝辛巳至正元年玉案山生小

赤犬羣走如飛段雄正曰此天狗星所化大兵壓境之兆

經二年方絕又下鐵雨山石民屋俱穿人值之多擊死梁王刺殺段氏臣高蓬先是光令蓬督兵羅那關梁王使人暗招之蓬不從答之詩云寄語下番梁王翁檄書何苦招高蓬身爲五嶽嵩山主智過六丁縮地公鐵甲鐵盔持鐵梨花鞍花索馭花驄但揮眼前黃石陣孤雲擊破幾千重梁王忌之乃重賂蓬庖人刺殺之順帝甲申至正四年光卒弟功襲光任職十二年

段功 光之弟

段功元順帝乙酉至正五年襲朝命止授爲承務郎蒙化州知州至正六年木邦夷思可叛元命河南泰政賈敦熙督師會雲南路兵討之以功爲前鋒屢戰克捷叙功陞功爲大理總管尋陞泰政至正癸巳十三年紅巾賊流入建昌旁掠雲南邊地阿次失里討平之至正十五年三月元竄太師脫脫於雲南中書右丞哈麻御史袁賽因不花等陷之也十二月左丞相哈麻矯詔殺脫脫於阿輕乞之地時年四十二歲天下寃之兩日相盪是年梁王宮中有怪左右啟王曰盤龍寺僧蓮峯能驅邪王禮請至行法怪息

何僧曰二十年後祚盡矣至期明師果南下至正十六年
黑井有毒龍興水溢井損民居蓮峰建寺書鐵符沉井中
害息又甯州有虎啣人蓮峰灑淨水驅虎遠去明日虎果
去七月元以四川廉訪使蒲機雲爲雲南諸路廉訪使至
正癸卯二十三年三月紅巾賊明玉珍率其黨李芝蘇同
弟明二等將兵三萬攻雲南入金馬山梁王把匝剌兀爾
密奔楚雄四月梁王發申慶至石碑村紅巾入城梁王聞
報感而自咏云野無青草有黃塵道側仍多戰死人觸目
傷心無限事雞山還似舊時春隨命陝西秦政車力帖木
兒拒之擒明二於時四方乘機竊發羣盜滿山功乃謀於
外外楊智字淵海者同稽於卜卜告吉又得子宗子秀兵
至功遂從梁王進兵呂合敗紅巾於關灘江紅巾收合餘
屺再戰殺段氏之驍將鐵萬戶又有江心莊人楊勝力戰
死梁王爲文祭之曰生於江心爲我門戶我舊不識用備
其數能衛社稷春秋與之惟忠惟烈爾則處之隱義重於
生生必有死丈夫之事識者有幾願氣作山河魂歸蒼洱
英傑復生以保我之昆裔祭畢而哭一軍感泣是夜紅巾
屯古田寺功令人焚寺紅巾亂以鐵騎搏之死者大半追

至回躡關又大破之副將謝得攻安甯功力戰殺千人謝
得奔中慶於夜功謀者拾得一書乃明玉珍母寄珍書云
自爾去後老母平安征雲南務要得之兵糧不足隨後發
來不可輕回功閱書令楊智易其辭曰自爾去後老母不
安臣下亂法又聞中國人馬入界非止一處爾須急回遲
則難保大夏天統元年太后平安書遂募亡命者賫書往
有打金箔人陳惠願行惟慮老母在功許養其母惠遂往
玉珍得書揮之去令回報迨夜王珍旋軍功追攝至七星
泉破其眾梁王回中慶奏陞功爲雲南行省平章以玉

阿禧妻之一日王與禧宴酣禧歌金指環云將星挺生扶
寶闕寶闕金枝接玉葉靈輝徹南北東西皓皓中天光映
月玉文金印大如斗猶唐貴主結配偶父王永壽同碧雞
豪傑長作擎天手功火居梁王府嫡妻高夫人在大理作
詞寄功云風捲殘雲九霄冉冉逐龍池無偶水雲一片綠
寂寞倚屏幃春雨紛紛促蜀錦半間鴛鴦獨自宿珊瑚枕
冷淚滴針穿目好難禁將軍一去無度身與影立影與身
獨盼將軍只恐樂極生悲冤鬼哭至正二十四年春功還
大理至洱海金雞廟夫人遣人適來報生子功喜作歌曰

去時野火通山赤凱歌回奏梁王憚自冬抵此又陽春時
 物變遷今又昔歸來草色綠無數桃花正穠柳苞絮杜鵑
 啼處日如年聲聲只促人歸去至正二十五年功思新婚
 欲往梁王所員外楊智於僻間題詩留功張希矯亦上書
 留行功曰寶劍豈埋荒土物耶矯苦留不已功怒流矯於
 順州順州前明屬鶴慶府今裁在永北廳城西一百二十里唐時地名牛睽遂與夫人別倍
 道至中慶梁王疑之私議曰平章此來得無有吞金馬嘔
 碧雞之心其下有姤功者復讒搆之王與阿蓋謀欲以孔
 雀膽毒功蓋私洩之願與西歸今功周防功不信是年滇

大旱人言定遠有禪僧通結通瑜伽秘密教能降龍役鬼
 啓梁王王遣人迎至僧設壇祈雨咒畢鉢中出一小蛇遂
 大雨王喜酬以金帛辭役鬼荷擔行空而去順帝丙午至
 正二十六年春中原盜讎起臨安庶訪使支渭興三懇休
 梁王不允遣使金閭慰賜羔羊渭興自咏曰年高才薄泰
 清流欲挂朝冠不自由且喜壯懷無訴諜從教行道有鳴
 騶故園花木無由見何日干戈定得休九十春光還欲暮
 放懷聊與醉金甌重午節梁王宮門外觀射柳隨侍文武
 賜宴支渭興詩賀曰平地如席草如茵少年將軍酒半醺

朱鬣馬穿 人影過綠楊枝逐箭鋒分旌旗色映宮前尾鼓
角聲飄海 上雲何日鯨鯢俱授首普天偃武共修文七月
梁王偕功 東寺講經至通濟橋功馬逸王乘機令番將掖
殺之阿裨 聞之慟哭曰昨燈下吾猶言雲南施宗施秀二
人以胭脂 殞命奈何不信今果遇害矣命侍女錦被包之
以上禮歛 送歸大理作詩輓之云吾家住在雁門深一片
間雲到滇 海心懸明月照青天青天不語今三載黃嵩歷
亂蒼山秋 誤我一生踏裡彩華言錦被也吐嚙吐嚙段阿奴施
宗施秀同 奴及雲片波潏不見人押不蘆花華言起死靈草也顏

色改肉屏華言駱駝也獨坐細思量西山鐵立華言松林也風瀟灑

功喪既行阿裨遂不食死以殉焉其家臣員外楊智淵海

聞而亦死之智臨死詩曰半戰功名百戰身不堪今日總

紅塵死生自古皆由命禍福於今豈怨人蝴蝶夢殘滇海

月杜鵑啼破點蒼春哀憐永訣雲南土絮酒還教灑淚頻

明洪武間都督馮誠經功墓亦步原韻題詩吊之曰出橫
五百劍孤身轉眼關山半委塵北關玉樓召客記南滇粉
壁說詩人蒼山夜黑雲遮月金馬天寒鳥
怨春共惜平章迷繡幕至今愁聽水聲頻功死長子寶自

稱平章立於大理功任職二十二年

段寶 功之子

段寶於元順帝丙午至正二十六年八月因父功爲梁王所害遂自稱平章立於大理是年梁王開科取士以支潤興主試事梁王復聽讒誅鋤段族梁段既結仇數數構兵鶴慶知事楊昇調和二家自金雞廟分界南屬梁王北屬段氏力勸息兵百姓稍甯至正丁未二十七年四月梁王生日羣臣稱賀王宴於昆明池上省憲官獻詩曰賢君添算宴嘉賓幄殿先施巨海濱萬里晴天開錦繡一川芳草踏麒麟笙歌暖送金杯酒鎧仗寬圍玉珮人醉飽百官咸稽首願王高壽過千春中慶路土主廟圯梁王重修立碑

紀事

先是至正十二年廟爲耆民楊光所修至二十三年紅巾賊入滇陷中慶燬民居廟亦被焚 梁王

欲并段氏遣人刺寶弗得又令平章矢刺七攻大理皆不克乃遣使通好奏授寶爲雲南右丞以和之紅巾復入滇梁王命叔鐵木的罕賫勅借兵於寶寶答書曰殺虎母還餒虎子分狙栗自詐狙公假途滅虢獻壁吞虞金印玉書設釣魚之香餌繡閣艷女備擒雉之網羅况平章已死只遺一奴一嫠奴可配阿嵯妃嫠可配華黎氏二事許諾當借大兵不然金馬山換作點蒼山昆明海改作西洱海兵來矣書後又附一詩云烽火狼煙信不符驪山一舉任枝

梧平章柱掛紅羅帳員外空題粉壁 圖鳳去岐山祥兆隱
麟戕大野瑞光無自從界限鴻溝後 成敗興亡不屬吾梁
王讀而深恨之是年明太祖取燕京 元順帝北遁元亡明
太祖戊申洪武元年梁王復通好於 寶辭甚卑遜寶許之
和時有蠻舍興者自元江攻入鄯闡 王懼欲出奔寶以唇
齒之故率兵救之擊走舍興王德寶 陞爲武定公勅曰段
氏歸附而來忠勤懋著父子秉忠 征討克捷乃於戎馬倥
偬之中干戈紛擾之際不第遠朝 且兼平亂宜示至優之
數以彰匡濟之勲茲特陞寶爲武 定公仍總管大理軍民

府爾其不負初心永保世爵以光 大爾赤城於無窮宣光
元年勅云云宣光乃故元順帝太 子立於應昌年號也太
祖洪武辛亥四年寶降於太祖上 奏云臣聞有天下者爲
天下之主有列土者爲列土之君 卑臣寶雖隔萬里之遙
每切中原之向大理有二帝三皇 之後一方九姓之傳漢
晉六朝以來大蒙國受封於前唐 殘唐五季而終二理國
繼守於兩宋臣祖思平等恪共藩 服貢禮屢修於中土華
風遠暢於邊隅迨至故元不尙仁 義專事暴殘順帝已遁
北方梁王猶禍鄯闡邇聞明主奉 天承運御極南京中原

太平邊徼甯又意者中國有聖人履堯舜之正統陋漢唐之淺圖天時人事然也或命臣依漢唐故例歲貢天朝或倣元代職名俾守舊土庶深谷回賜幽局照日八方浴德六合同春垂憐邊境救卹一方欲修進貢恐觸明威合待事體之定專候聖旨之頒謹此專差段貞王伯鵬馳奏以聞太祖詔諭答之洪武五年寶女兒名羌娜小名僧奴又名寶姑者適建昌土官阿黎先是羌娜繡一旗至是將嫁以旗付寶囑曰母常語我云爾父為梁王所害必當報仇惟望爾輩長大我聞母言故繡此旗已五年矣今我嫁至

夫家收拾建昌東川軍馬飛報若到女急來應慎勿違焉

臨行又以二詩別寶云珊瑚鈎起出深閨滿目潸然淚濕

衣冰鑑銀臺前長大金枝玉葉下芳菲鳥飛兔走頻來往

桂秀梅香不暫移惆悵同胞未忍別應知恨重點蒼低何

彼穠兮花正紅香車獨去洱河東鴻飛雪岫難經目風刺

霜林易割胸雲白天高連水遠月新春疊與秋重

宛父魄天邊淚珠恰似通宵雨千里關山幾處逢

提劍屬兒曹洪武辛酉十四年四月國中有巫女歌曰莫

道君為山海主山海笑諧諧園中花謝千萬朵別有明主

來數日寶卒子明襲寶任職十四年

段明 寶之子

段明明太祖辛酉洪武十四年四月襲梁王授明爲宣慰使九月明太祖命穎川侯傅友德列侯曹正王弼金朝興都督郭英張銓等率師三十萬征雲南帝出餞於龍江友德至湖廣分遣都督胡海洋陳桓等領兵五萬由四川永寧趨烏撒友德等率大軍由辰沅趨貴州進攻普定擒土酋安瓚諸苗蠻犵狁聞風迎降十二月傅友德等兵至普安攻下之進至曲靖先是梁王把匝剌兀爾密遣其司徒

平章達里麻將精兵十餘萬屯曲靖以拒明師沐英曰彼謂我師疲於深入未有虞心乃可破也友德然之遂倍道進師將至白石江忽大霧四塞衝霧及江而上頃之霧霧則兩軍相望達里麻見之大驚以爲神軍飛至擁軍陣於南岸沐英分遣一軍沂流潛渡出其陣後吹銅角樹旗幟爲疑兵山谷間達里麻急撤陣後軍以禦之岍上軍陣亂友德等趣師濟江一湧而渡旣濟整列進戰敵衆披靡生擒達里麻橫屍十餘里俘其衆二萬人友德悉慰遣之友德進擊烏撒分遣沐英等趣雲南梁王聞達里麻敗棄城

走晉甯州忽忽納岩尋入滇池島中先縊其妃自飲藥不

死投水死之父老收葬雲南城西三十里淨耳山土人立

廟妙音寺側後至嘉靖間拆廟材修社學乃因舊址為小寺祀之雲南右丞觀音保

以城降英等入城秋毫無犯收梁王金印並符信圖籍安

撫其民友德亦自曲靖循格孤山而北以應永甯之兵時

元右丞實卜聞胡海洋等進自永甯乃聚兵赤水河以拒

之海洋等造木筏夜半濟河而友德亦至實卜遁去友德

令將士於烏撒築城版鋪方具蠻眾復合斬首三千餘級

餘眾潰散遂城烏撒得七星關以通畢節又克可渡河於

是東川烏蒙芒部諸蠻震懼望風降附先是洪武壬子五

年正月帝遣翰林待制王禕行參政吳雲持詔諭雲南梁

王令奉版圖來歸梁王初不從後有降意至洪武六年十

二月會元太子愛猷識里達刺立於漢北使侍郎脫脫微

餉於雲南脫脫微知梁王有二心因以危言偪王殺使臣

以絕其念王遂殺禕父老收屍葬地藏寺北吳雲奉使時

會梁王遣鐵知院等二十人使沙漠為邊將所獲帝乃釋

二十人令與雲俱行至沙塘口二十人謀曰吾等奉使不

達被執而還罪必死乃說雲令胡服編髮詐為元使又偪

令改制書共給梁王雲不從以死自誓亦被害梁王遣人

收雲骨葬給孤獨寺及事聞帝震怒故有是役按王禕字子克浙江

金華府義烏縣人建文時賜謚文節永樂登極凡建文設施盡革遂削禕謚後至正統中義烏縣丞劉傑奏請加奉使雲南死節臣恤典禕賜謚文忠吳雲字友雲江蘇常州府宜興縣人至弘治中贈謚忠節並祀雲南勅賜為二忠祠是年冬十二月明卒叔世襲明任職一年

段世 寶之弟明之叔

段氏明太祖壬戌洪武十五年襲二月世聞鄯闡破梁王

已死又以沐英等兵略尋甸臨安澂江元江楚雄洱海次

第皆下進偪大理乃遣使致書請依唐宋故事奉正朔為

外臣友德不聽答書諭令速降凡三致書世怒遂遣都使

張元亨州判李洪赴軍前下戰書畧云鄯闡危甚登天大

理險倍投海英如漢武昔戰僅置益州雄若胡元設官止

於中慶取之易而守之難莫若依吾請乞册封定為進貢

始為良策吾實武人不通經史前代得失則屢聞也恭惟

麾下振耀皇威功不亞於孔明才克比於方叔滌山川之

舊染歷代所未有也况吾與爾既無殺父之仇又無財債

之怨無故交戰真乃不祥爾屯威楚彼處之民有何罪焉

若耗人之食是絕其命取人之財是剗其心墟人妻女是

亂人倫則吾之應不得已也爰念爾等皆中國之人其中豈無一二達士得此何益不得何損西南之地號爲不毛易動難安今春氣漸暄煙瘴漸起不須殺爾四五月間雨霖河汎爾糧盡氣散十散九死形如鬼魅色如黑漆欲活不能爾之進退狼狽矣莫若乘此天晴地乾早尋活路寧作中原鬼莫作邊地魂爾宜圖之後理國段世頓首書後繼一詩云長驅虎旅勢威宣深入不毛取暴殘漢武故營旂影滅唐宗遺壘角聲寒方今天下平猶易自古雲南守獨難擬欲華夷歸一統經編度量必須寬友德英等覽書

大怒拘其使左副將軍蘇玉等率師逕進兵至品甸世恃田菴和尚有術列兵五萬扼下關沐英自將攻之不克乃命王弼率兵出洱水之東趨上關英以兵綴下關爲犄角勢別遣胡海洋將一軍夜渡從石門間繞道出點蒼山後緣崖而上張旗幟遲明英先驅渡河斬關而入海洋之師亦從山而下腹背夾攻世衆驚潰拔其城世就擒並執明之二子苴仁苴義時二月二十三日也於是沐英等分兵取鶴慶麗江破石門關蕩金齒所有摩些和泥車里品緬等部相率歸附又略建昌故元平章月普帖木兒降闕二

月賜雲南各土官冠帶及誥勅使任本州知州等官四月
烏撒東川苾部諸蠻復叛傳友德沐英會兵進討斬首三
萬餘級諸蠻來降雲南悉平以烏撒烏蒙苾部地近四川
分隸之九月土官楊苴等叛糾眾至二十萬攻雲南城都
督謝熊指揮馮誠嬰城固守沐英自烏撒移兵討之斬首
六萬餘級擒四千餘人諸部悉定洪武癸亥十六年二月
故元右丞普顏篤同土酋高大一作天惠叛據佛光砦蔚按佛光砦即佛光山半山有洞可容萬人又名一女關昔諸葛武侯曾擒孟獲於此在大理府浪穹縣東二十里也先
不花叛據鄧州傳友德率郭英討平之又定蒙化州過

金沙江攻北勝府

今永北廳

擒故元平章隔生於是麗江府拒

津等州皆平前後斬首一萬三千級蠻民降者四十萬戶
帝遣耿炳文諭傅友德藍玉等班師沐英留鎮雲南別命
列侯王志仇成張龍分赴尋甸各府繕城池立屯堡安輯
人民是年械送世并明之二子苴仁苴義赴京世臨行以
詩別故人楊朝彥云雄兵一日破重關父子流離瞬息間
別後欲知相憶處錦江流水綠潺潺洪武甲子十七年四
月傅友德等班師至京論平雲南功進封傅友德為穎國
公胡海洋東川侯陳桓普定侯張翼鶴慶侯藍玉仇成王

弼張龍等並賜鐵券子孫世襲吳復金朝興先卒俱授世襲侯爵鐵券加祿並同餘陞職賜金帛有差以世首仁首義見帝帝誅其頭目論首仁首義及世曰爾祖寶昔年曾有降表朕不忍廢乃授首仁官雁門衛鎮撫賜名歸仁首義官武昌衛鎮撫賜名歸義世任職一年段氏之世土至此而絕帝又封其族段保為雲龍州土知州

按段氏襲總管十二世起南宋理宗辛酉景定二年為蒙古世祖中統二年詔明太祖壬戌洪武十五年共一百二十二年

南詔歷代名宦

張元漢元帝時守 張翕東漢明帝時守 鄭純同時
王追東漢順帝時守 王伉後漢時永昌郡丞 呂凱同時永昌郡功曹 前有文齊吳霸陳立後有張亮劉寵健為費詩巴東馬忠皆著勳績 李毅晉惠帝光熙元年為甯州刺史政治明達五苓夷反時病卒其女秀有父才領州事至懷帝時贈少府謚威侯 王遜東晉明帝大甯元年為晉甯守華夷畏服夷叛死之州人以中子堅領州事官至平西安南將軍

南詔歷代鄉賢附元朝進士

漢盛覽字長通葉榆

今大理府太和縣

人受學司馬相如著賦心

四卷同時葉榆張叔天資高穎書過目成誦俗不知學叔

每病之聞司馬相如至若水

射按水經注若水南經雲南郡之遂州縣廢在今大理

府賓川州城東北一百里古稱白門置於漢時今為金沙江巡檢司地

遂負笈往從之受經

歸教鄉人

隗叔通葉榆人性至孝母好飲江水通日入

江取水維艱灘中忽出平石涉取甚便人謂之孝子石

東漢許叔

一作叔重

昆明人明帝時入中國受立經歸為本郡

教授 尹珍字道真平爨人桓帝時入中國負笈從許慎

受經學還教鄉人

唐尹仇寬葉榆人德宗貞元間為蒙

氏清平官入朝陳地圖貢方物唐拜為左散騎常侍封高

溪郡侯

張志成昆明人文宗太和間入蜀學王羲之草

書歸教國人

元王昇昆明人曲靖宣慰副使學政名時

段文瑞澂江人讀書盡孝 詔旌其門仕至臨安總管

楊惠楚雄人孝母感神詔旌其門

張景雲昆明人仕至

臨安經歷

陳寶平爨人仕至尚書尹貢南寧人仕至尚

書以上三人皆德政名時

元朝進士王楫李近仁段天

祥李天佑李郁五人皆三甲同進士出身

南詔各種蠻夷

六十條

白民

有阿白白見子民家子等各白國之後即滇中之土著婦女出門携傘障面謂之避嫌宴客切肉拌蒜名曰食生餘同漢人女鑲邊衣以銀花銀吊為飾

蒲人

即古百濮周書所謂微盧彭濮也後訛為蒲質黑烏音男子清布裹頭衣套頭衣膝繫黑藤婦人挽髮為髻腦後戴青綠磁珠花布圍腰短裙繫海貍十數圍帶刀弩長牌不畏深淵或浮以渡婚娶長幼舞蹈吹蘆笙為孔雀舞婿家立標竿上懸絲繡荷包中貯五穀銀錢等物兩家男婦大小爭緣取之以得者為勝又有野蒲普蠻樸子蠻等類性尤克悍男子以布二幅結於左脇另用布一幅合纏挂身以紅布搭右肩蔽腰以下今順甯府多此種

棘人

一名百夷又名擺夷性耐暑熱居多在棘下本瀾滄江外夷人有水旱二種水棘夷近水好浴薙後髮蓄前髮盤髻如瓢故又名瓢頭棘夷旱棘夷山居耕獵又名漢棘夷男

青布裹頭簪花婦女不施胭脂粉自然白皙盤髮辦紅綠包
頭飾以五絲線鬚衣五色衣桶裙繡邊其俗賤女貴男頭
目妻數百人庶民亦數十耕織貿易皆婦人任之凡婚娶
男女相悅而議聘一成匹配不肅而嚴如夫婦不睦聽夫
付之一物為憑然後改適有邪術能使男子千里不忘其
法不外傳也

猓獾

蠻蠻盧鹿之裔猓獾其訛音也以五月為春信鬼尙巫巫
有大規繪拜馮白馬之號卜用雄鷄兩髀骨骨有細竅刺
以竹簽視多寡向背之勢以定吉凶其部長妻曰耐得勇
士曰直可每歲六月廿四日名火把節燃松炬照村砦田
廬男椎髻鑷鬚耳環佩刀婦披髮短衣桶裙披羊皮

白猓獾

一名撒馬都即西蠻白蠻知讀書能文字舌音清便多習
漢人見尊長披羊皮故嫁女授羊皮一張短衣革履胸挂
花包婦人花衣桶裙青布蒙頭飾以海貝鈿鈴

黑猓獾

即東蠻烏蠻其祝以鈴其占以草男挽髮貫耳披瓊佩刀

婦人貴者衣套頭衣方領如井字無襟帶自頭罩下長曳
地尺許披黑羊皮飾以鈴索

乾裸羅

以山居得各每食插筋飯中仰天跪拜為報本好勇喜鬪
殺人償以財服飾同黑裸羅婦人頭挂一羊毛筐行住紐
毛為綿以織毯

海裸羅

一名壩裸羅以種水田得名蓋土人以水為海以平田為
也居家儉樸知讀書服飾如漢人婦如白裸羅

擾邊大為唐患又以世隆之名犯太宗元宗廟諱唐不册
封隆益致怨望至是自稱皇帝遣兵取烏蠻爨蠻之地置
東川郡前節度使杜棕變韋臯制度侵擾蠻中隆絕朝貢
冠播州至是李福為節度使隆遣清平官董成至成都移
書於福成與福抗禮福囚之上聞有詔釋成名至京師見
便殿遣還咸通二年遣兵陷安南左僕射同平章事杜棕
言西川兵弱南詔強盛未可輕絕宜遣使祭弔諭令改名
行册禮帝肯之會隆復寇鴛州遂止咸通三年隆親寇蜀
取萬壽寺石佛歸時高真寺僧崇模有神術從征軍中之

糧又值歲暮士卒思歸僧呪沙成米呪水成酒士卒各醉飽一日僧化蝶回國亂宮世隆妻以書達隆隆答曰妖若再來令宮人於其衣背繡蝶後僧復至宮人繡之隆見僧衣有蝶令斬之刑七次首不殊僧自云用茅鋸之乃斷果然人見僧塊化一黑鵬飛去蓋僧本高真寺鵬巢中所得之兒也咸通四年寇西川咸通五年陷安南邕管咸通六年陷雋州咸通七年復攻安南嶺南西道節度使高駢救之隆兵大敗駢遂定安南咸通十年隆遣使楊西慶等人朝謝釋董成之囚歸成都俘二千人定邊節度使李師望褐被毡佩短刀女披青布單短裙長袴又有骨瓦老烏撒完洒泥阿蝎阿係等類衣飾風俗畧同

老牯獾獾

即羅發又名羅午羅武男披髮貫耳披毡佩刀穿火草布衣女辮髮垂肩飾以海貝碑磔穿火草布裙無床幃被褥

獾黑

以松毛籍地而卧
蒲蠻別種擇蔽篁深處結茅而居蜂蟲鼠蛤無所不食以蕎稗為上品又有大獾黑小獾黑巖居野處猿獠同類

普特

以漁爲業舟不盈丈而炊爨牲畜資生之具無不咸備泗水出沒口銜手提皆巨魚也今雲南府省城西碧雞山下多有此種

地羊鬼

亦棘人類也短髮黃睛好狡嗜利與人相仇能行妖術以木石易人心賢或以一帛繫衣後變形爲象馬猪羊猫犬等物稍畏懼之卽爲所魅入人腹中食五臟或潛至人家偷竊財物食嬰兒知者一手捉之一手痛毆必復爲人奪其帛糜之彼必以家貲之半勾脫或有娶其女者夫每出必問歸期卽餌以毒如期而歸更以藥解否則毒發而死交易失信及私窺其要女者必毒之此種元江州爲甚

窩泥

有和泥幹泥哈泥路粥等各黑白兩種風俗畧同男戴麥稗帽穿火草布衣耳環跣足婦女辮髮數縷海貝雜珠盤旋爲髻套衣桶裙善養猪其猪小耳短身長不過三十觔肉肥膾名窩泥猪婚用媒妁路遇野獸則返而他求嫁則以紅藤束膝爲識勤生畜用每積貝一百二十索爲一窖

臨死囑其子曰積貝若干汝取某窖餘留我為來生用死
則以雌雄雞各一殉又有一種名糯比與此同其生者名
哥泥亦名瓦黑好勇尚鬪能咒人使病

阿昌

一名峨昌男短衣披布單女長衣無袴腰纏紅藤古用竹
三十三枝畧如筮儀嗜酒覓禽獸蟲豸生瞰俗見死
弟妻嫂後有羅拔若百夫長早正死其妻其女自誓不失
節餓而死其風遂革又有小阿昌其俗畧同

阿成

男短衣女桶裙以樹皮代瓦婚用牛牛至女家以水潑女
足為定

比直

雙夷別種男耳環革履女白悅束髮纏疊如仰螺構樓而
居近水極寒猶浴裘尚緋夫死妻不再嫁名曰鬼妻又有
白布纏足者名白脚雙夷亦名孔蒼西齒文身髡者名光
頭雙夷額上點刺月牙紋蓋習車里之俗所謂雕題也

黑舖

亦名黑普俗同窩泥形容黧黑怕見漢人畜山羊作竹器

一切床几櫨杙 備極精巧

黑乾夷

男推髻麻衣耳環垂肩女以毛褐細帶編如篩罩首飾以海貝神槩衣領亦然婚配男吹蘆笙女彈口琴唱和調悅

先野合後媒灼

山蘇

男披髮跣足女椎髻蒙頭語似鳥音形如猿猴潛居深山種蕎麻或工或獵夷中之最苦者

車蘇

亦名扯蘇傍巖踞水男短衣皮履女長裙無袴種蕎稗績線為業以羊毛占晴雨

喇雞

亦名喇記黑布帽白衫好樓居孟春作土主會客至掘鼠及蝦蟆為敬其在交趾者男善鎗女善弩多充交兵又有白喇雞男女俱穿五色瓊瓊食山蟲水蛇等物

喇五

亦曰喇烏又曰喇魯男如擺夷女如窩泥構樓臨水而居上入下畜名曰掌房其在騰越州者食巨蟒毒蟲或取蜂

精食之

僕喇

男插雞毛女裹首巾皆披羊皮衣不浣濯婚配先野合每

採蒙肚花蒙肚花樹皮如蘇能毒人醉死則醉採欲人

狂死則狂採以毒人又一種在王弄山者名馬喇

哈喇

男女黑色不知鹽櫛婦女紅黑籐纏腰數十圍產子以竹

兜盛之負於肩又有古喇杜喇色黑兀甚言語不通略似

人形而已

曼喇

克悍好獵居山巔戶不正出迎山開門不留餘粟

卡喇

亦曰卡腊男穿耳挽髮佩短刀女短衣無袴脛著彩色摺

袴聚族而居耕種鬻薪

卡隋

亦名卡高性頑鈍喜歌舞男女多野合婚娶通媒妁之曰

議聘金多至數百娶後子孫猶有代祖父償聘金者

卡瓦

多在順甯永昌二郡辣蒜江外貌配性惡獵人以祭商賈
出騰越州入木邦者必經其地呼爲卡利瓦有生熟二種
生者劫掠熟者保路

西番

卽土番亦名巴直居金沙江邊性悍戾善弩男女辮髮百
結不知櫛流男以藤纏左肘披琵琶氍暑熱不脫女以海
貝磗磁珠飾於項又有野西番更不可制

古宗

一名猪踪西番別種皆辮髮百結男戴紅纓穿氍毹挂銅
鈴佩刀女飾以珊瑚銀泡披腊瓦被單皆穿烏拉韉經年
一櫛櫛必牲祭春夏種蕎稗秋冬趕牛馬取牛羊乳酥調
油茶而食名曰饊飽又有小古宗喜獵飲酒餘畧同

果蔥

冠青而脫耳環踏履衣尙素聘用牛貧不能具者傭女家
三年

苦蔥

面醜男麻衣短袴女短衣桶裙亦有衣袴相連者耕山採
藥爲生所佩環手繩自幼至老不釋死以殉

摩娑

烏蠻別種性淳樸烏音男雍髮戴帽長領布衣女高髻或戴黑漆尖帽短衣長裙畜牛羊產射香同類仇殺婦女登場一勸即止歲暮殺牛羊相邀一客不至為恥今有讀書入泮者

力娑

即獐獐衣麻披氈巖居穴處利刀毒矢刻不離身登山捷若猿猴以土和蜜充飢得野獸即生食尤善弩每令其婦負小木盾前行自後射之中盾而不傷婦以此制服西番

野力娑披髮插羽尤克悍

遮娑

男女皆穿耳挽髮喜華彩衣盤旋蔽體每飲食必精潔而長於弓弩尤善鳥銃

羯娑子

自孟養流入環眼鳥隊散髮纏藤耳帶大環首插雞羽無衣袴腹下以麻布一幅圍之負弩佩刀喊聲如犬又有結娑耳帶象牙大環紅布圍頭衣半身衫袒右臂亦其類也

拇雞

海召野史

下卷

三十三

亦作猓獫形醜惡婦女尤甚椎髻插羽佩刀負弩獵食狼
狙見人有蓄思盜先用雞骨卜吉則往否則止

摩察

亦名木察束髮耳環披氊佩刀執木弩藥矢獵取禽獸婦
女皂布蒙頭飾以海貝長裙細褶多至二十餘幅前後無
袂名曰桶裙

嫚且

男女皆麻衣袴披羊皮以五月爲正月性好飲男女皆同
男吹蘆笙女彈口琴歡飲竟月過此則終歲忍饑野菜充

腹而已

土人

思絮襖佩刀弩女披氊毛腰束皮索飢則繫縛之婚姻以
刀甲爲聘披髮見舅姑有爭者告天沸湯投物以手捉之
曲則糜爛直者無恙

儂人

儂智高部落之裔男束髮短衣女短衣密扣腰纏紅裹肚
性克狡漆齒出入佩刀長技在銃

沙人

越析夷也又名蒙雋男辮髮長衣女以挑花白布蒙頭腰圍紅布出入佩刀耕田射獵所居掌房喪服用紅祭肉棄不食又有黑沙人白沙人聘用牛既婚之夕男女不同室及回女家有娠方歸

標人

男束髮披氊女短衣露腹纏紅藤腰繫沙羅布裙上短下長

男女同耕

狛人

男纏頭跣足女青布纏頭畧如僧帽綴以海貝彩布衣裙着大尖鞋構樓而居甘犬嗜鼠又有雜糲麥名登嗎喇毛等類頑良不一衣飾風俗畧同

怒人

居永昌怒江內外其江深險四序皆燠赤地生煙每二月瘴氣騰空兩隄草頭交結不開名交頭瘴男子面多黃瘦剛狠好殺射獵或採黃連為生鮮及車壽婦人披髮纏藤勒首每年貢鹿皮二十張山驢皮十張黃蠟八十觔麻布三十度以代賦稅

狻人

南詔野史

下卷

三十五

麗江府鶴慶州大雪山外男女披髮樹葉為衣耳穿七孔
墜以木環與怒人接壤畏怒人不敢越界

野人

永昌界外居無室廬宿於樹巔赤髮黃睛首戴骨圈插雉
羽手足腹皆纏紅藤以幅布或樹皮拚下體執勾刀大刃
捕禽獸蛇蟲生食之逢人即殺

老撾

南掌國夷類戴藤篾黑漆帽寬二口八許短衣無袴用襟色
布一疋從膝下兜繞圍結胸前各打抄子婦女耳貫大黑

漆圈

塞以
野花

列密

即利米刀耕火種精射獵得鼠雀生噉之男篾帽皂衣女
辮髮赤足出外披化布以蔽其身

喇嘛

麗江鶴慶多有之亦自西藏招本境摩些為徒有紅黃二
教紅弱黃強趨帽襴衫各如其色

苗子

二苗之後有九種黔省最多流入滇中者惟仲家花苗而

已束髮耳環未婚者縛楮皮於額或插雞毛女布冠套頭
衣桶裙皆用五絲桃花布爲之每歲孟春跳月男吹蘆笙
女振鈴唱和並肩舞蹈終日不倦或以絲爲毬視所歡者
擲之暮則同歸比鄰乃散然後議婚節序擊銅鼓吹喇叭
聚賽神書契惟數十字及六十花甲子同餘不同

土獠

其屬本在黔蜀粵西之交流人滇中男首裹青布白衣領
綴紅布一方婦人冠紅巾衣花繡性粗桀好蠱魔之術其
蠱夜飛如星光芒搖以射人窓櫺觸者病

交人

安南國之類男簪笠蕉扇衣裳楚楚婦女面貌頗雅手貫
牙釧長衣長裙以紅帕蒙頭皆披髮鞞鞋讀詩書習禮儀
婚喪之事俱倣中國

緬人

緬甸國流入者有老緬阿瓦猛別雍會普幹擺古得楞子
等類長於烏銃其火藥用麥麵傳之迅疾無聲又有緬目
者稱爲莽紀斷髮文身漆齒穿耳蟒衣跣足頭帶紅緞一
方性喜花草

南詔古蹟

八十條

王母坪

大理府城西北三里許點蒼山觀音峰蔚點蒼山一名靈鷲山在大理府城西三里許自北而南綿亘百餘里高六十里橫列如屏內抱如弛弓即漢書所謂邪龍雲南山似扶風太乙之狀是也山有十九峯中一峯名中和中和之北為觀音應樂雪人蘭峯三陽鶴雲白雪蓮花五臺蒼琅雲弄十一峯中和之南為龍泉玉局馬龍聖應佛頂馬耳斜陽七峯共十九峯十九峯之下有十八溪中和峯下為中溪中溪之北為桃溪梅溪隱仙雙鴛白石靈泉錦溪芒湧陽溪萬花霞移十一溪中溪之南為綠玉龍溪清碧莫殘葶蕩南陽六溪共為十八溪左支約十畝世傳王母曾降於此蔚按有明萬建歷間碑記祠祀之

雲王碑

雲南府省城十五里碑文云昆明隋西蠻王之墓碑成都閩邱均撰文蜀人賈餘絢書丹

鐵橋

麗江府城西北三百里癸巨津州北一百三十里州本唐時羅婆九賧地橋跨金沙江隋文帝開皇間所置蔚按唐德宗貞元十年南詔王異牟尋襲擊吐番戰於神州取鐵橋等十六城即此是

盟石

蒙化廳城北二十里路傍建甯國張樂進求欲讓國於蒙

細奴邏邏曰如果我應爲君斫石劍入斫之劍果入石三寸名曰盟石

古鏡州城

大理府雲南縣地城西北十里唐時所置領夷郎等六縣址尚存

地符

大理府趙州白崖石上有篆文赤如丹砂蒙氏以爲地符禁人踐汚一云在今雲南縣西三里

鳳凰臺

大理府浪穹縣北二百步昔施浪詔施望欠築下有白沙井亦望欠鑿

觀音大士石刻

永北廳城東石壁間唐吳道子畫刻於此

轆角莊

大理府城南二十里南詔蒙閣邏鳳有女欲爲擇配女曰擇配非天婚也我欲倒坐牛背任牛所之不問貧富貴賤牛入之家則嫁之鳳勉從其請至一委巷牛側其角而入見一老媪問媪有子否曰有一子往樵矣女卽拜媪爲姑

嫁其子令報鳳凰大怒絕女一日婿問女曰首飾是何物
所製女曰金也婿曰吾樵處是物甚多頃之載歸果金也
女遂懇請讌鳳凰使人難之曰汝能作金橋銀路吾當來
汝女遂作以迎鳳凰歎曰信天始也遂名其地曰轆角莊
言牛入隘巷角如轆轤轉也

蒙舍城

蒙化廳城北唐玄宗戊子天寶七年勅置陽瓜州於此封
閣邏鳳之子鳳伽異為刺史

南詔德化碑

大理府城南太和村古城閣建鳳叛唐歸吐蕃立碑國門
外明不得已之故清平官鄭回撰文唐流寓御史杜光庭
書丹

雲南府省城

唐代宗乙巳永泰元年鳳伽異築至明太祖壬戌洪武十
五年修周九里三分高二丈九尺二寸共六門南曰麗正
門樓曰近日大東門曰咸和樓曰殷春小東門曰敷澤樓
曰璧光北門拱辰樓曰眺京大西門曰寶成樓曰拓邊小
西門曰威遠樓曰康阜

優曇花

雲南府省城土主廟南詔蒙氏時有僧菩提巴波一名人
又法師自西天竺來以所攜念珠九子種左右樹高數丈
枝葉扶疎每歲四月花開如蓮有十二瓣遇閏多一瓣今
存西一樹尚茂

鹽井

滇中共四十處惟楚雄府姚州之白井楚雄縣之黑井琅
井為佳蒙氏時洞庭龍女牧羊於此羊忽入地掘之鹽水
出故名白羊井今稱白井若黑琅二井因黑牛與狼舐地

知鹽故名以狼為琅取音同也

神石

楚雄府南安州石高十餘丈土人每歲以金箔貼其頂有
禱輒應蒙異牟尋封為南嶽

白崖城

大理府趙州東六十里蠻語謂州為臉南詔有十臉此即
白崖臉也

穿心塔

雲南府省城外官渡昔有螺精為患建塔鎮之市有碑蒙

氏摩訶羅嵯會盟立

靈會寺

大理府城北喜州院旁村蒙氏征摩些渡金沙江一木自水中逆流異而取之造成千光如來佛置於彼中藍婆寺忽大雨浹辰村民煙火盡滅惟此佛前燈不滅軍中乃得火因迎像遷大理建寺奉之寺有古梅一株鐵幹橫撐花千層作紅玉色相傳蒙氏時所植故人呼為唐梅寺

石佛

囉裏籠即今雲南府宜良縣崇真寺蒙尋閣勸立

五華樓

大理府城內滇王蒙豐佑建方廣五里高百尺上可容萬人下可建五丈旗蒙古太弟忽必烈征大理曾駐兵樓前重修後遭兵火始廢今城中譙樓曰五華始存其名其廢址約在城之中央耳

高河一名馮河

大理府點蒼山玉局峯頂之南世傳觀音大士放黑龍於此使春夏居溫湯今龍尾關西溫泉秋冬居雪山蒙豐佑遣軍將晟君瀟山為池導山泉洩流為川灌田數萬源民得耕種

之利是名高河一名馮河巖壁聳削潭嵌以石版皆人力為之者潭深莫測水面有落葉鳥輒脚去

圓通洞

雲南府省城昆明縣治之西北螺峯山蒙氏時建寺內有圓通洞後至元代有蛟為患僧蓮峯行法鎮之李源道有碑紀其事

古城

雲南府省城東南詔蒙隆舜築與其子舜化貞者

香巖

大理府點蒼山中和峯之半其地草木皆香世傳為釋迦佛苦修之地又名香石巖

金馬碧雞

雲南府省城外二山東為金馬西為碧雞周時西天天竺摩竭國阿育王生三子長扶邦次宏德三至德一名驪王直低有神馬其色如金三子爭欲之王令縱馬以轡私授至德下今日能獲者與之至德部眾追至東山以轡收得馬至德即止焉故今名山為金馬扶邦宏德部眾繼往聞至德已得馬二人乃屯於西山時山有碧鳳土人不識呼為碧

雞二人亦同止焉故今名山為碧雞阿育王念滇遠恐三子不得歸遺其舅氏神明者統兵以迎將歸哀牢夷阻道三子遂不得返既歿扶邦為碧雞山神宏德為巖頭山神至德為金馬山神漢宣帝聽方士言遣諫大夫王褒求金馬碧雞之神褒未至滇至蜀中望祭而回移文於二神曰持節使王褒謹拜南崖敬移金精神馬縹碧之雞處南之荒深谿回谷非土之鄉歸來歸來漢德無疆廣乎唐虞澤配三皇黃龍見兮白虎仁歸歸來歸來可以為倫歸兮翔兮何事南荒也後至南詔大蒙國王異牟尋時封金馬碧

雞二神為景帝

羅刹封石

點蒼山五臺亭之上陽一作羊溪谷口有方石如樓狀世傳

觀音大士閉羅刹於此蔚按羅刹即漢書所謂雲南邪龍也又名戮魔石蔚按

大理為古妙香國本屬天竺國水居陸之半為邪龍所據是為羅刹好其人張敬者為巫祝羅刹憑之一日有老僧至西來主敬者僧即觀音大士也託言欲求片地藏修敬以告刹刹問所欲僧曰但欲吾袈裟一展犬一跳之地利許諾僧曰合止符券遂就水岸上書券石間於是袈裟一展犬一跳已盡其地羅刹怒悔盟而去僧雨鐵止之日別有勝地居汝蔚按點蒼山之陽溪化金屋一區刹喜移其屬入焉而山封矣僧乃鑿河尾洩水是為天生橋至今人以西洱河赤蔚按又島為大士地券云又按西洱河一名西珥河一名昆瀾也一名瀾海即古葉榆水也水經注曰罷谷

有召子也

下卷

四三

內言里身 一先 四四
之山洱水出焉源出大理府浪穹縣北十五里罷谷山下
經浪穹各寧一河至蒲陀崆各蒲陀江又各蒲桃江又一源
出麗江府鶴慶州會蒲陀江入大理府鄧州界分爲羅
時江瀾直佉江怒地江俱南流入上洱河池至大理府東
名西洱河形如月生五日抱珥之狀河之首尾抱點蒼山
雲弄斜陽二峰之足虛其腹納十八溪之水廣二十里長
六倍之中有亦文金梭玉几三島又西南行府城南龍尾
關扼之水乃洞天生橋而下趨迴繞點蒼山之背合蒙化
聽漾滄江之水注瀾滄江而入南海

天生橋

大理府城南三十里龍尾關之西南五里許即大士鑿洞
山谷使洱水下趨處也下斷上連深壑絕壁石梁跨之僅
度一人兩崖激水濺珠宛如梅萼人呼爲不謝梅橋北有

脊嶂名一線天

鶴拓

大士既洩洱水其地林藪蔽翳人莫敢入有二鶴日往來
河岸人跡之而入鏗利榛蕪乃得平土而居今大理府城
南舊建有雙鶴橋蓋誌其異

金坡

大理府賓川州城南二十五里地名賓居有仁慈大王廟
洱水伏流而出於廟下廟北坡上有上馬石臺名金坡大
王即張敬佐大士收羅刹者

盟祠

點蒼山中和峯之麓世傳三月十五日大士與羅刹盟於此故建祠祀之一名觀音市至今三月街商賈百貨集焉

竹王祠

臨安府通海縣漢有女子浣衣見有三節竹流來足間有聲破竹得兒長雄諸夷以竹為姓捐破竹於野成林後因於竹中為祠

玉案山

大理府城東洱河之東山漢司馬相如至此上疏請開益

州司馬遷亦曾至此其崖間刻字云此水可當兵十萬昔

人空有客三千

蔚疑此為唐南詔閣邏鳳所為

婦負石

大理府城南十五里陽和舖

今為觀音塘

世傳漢兵至境大士

化為老婦以稻草索縻一大石負之而趨漢兵見之吐舌

相誠勿露刃因其地為葉榆置吏焉

石現在觀音寺內

漢使臣廟

雲南府省城西三十里進耳山

蘭津橋

景東廳城西蘭滄江

蔚按即黑水也源出哇番鹿石山本名鹿滄流入滇境首過麗江府今廢

蘭州故名蘭滄後訛名瀾滄今又訛為浪滄白麗江流經大理府雲龍州流東南過永昌府蒙化廳順甯府景東廳元江州入交趾達南海山海經曰洱海西流入於洛故又名洛水西岸峭壁飛泉俯映江水地勢險絕以鐵索繫南北為橋東漢明帝時建

天威逕

大理府城南龍尾關之西為達永昌大道後漢諸葛武侯

七擒孟獲獲心服曰公天威也南人不復反矣故名此地

為天威逕蔚按交州記安南至邕州海多潛石運道不通唐節度使高駢鑿開五涇涇有青石不能治繼而震碎之涇始通因各天威涇與此各同而涇徑字異乃今大理郡誌載高駢天威徑詩云豺狼坑盡却朝天戰馬

休嘶瘴嶺邊歸路險巖今坦蕩一條千里直如絃以涇作徑高駢曾為嶺南節度使破南詔復安南未嘗至滇是詩當屬安南之涇無疑非大理之徑也郡誌似悞

畫卦臺

點蒼山龍泉峯下武侯屯兵此處草中得伏羲像因作八

卦臺祀之士人以為祭天因又名為祭天臺

諸葛碑二

一雲南府省城東二里舊漢營一不詳其處按碑文云碑

若踏巒為漢奴蔚考此碑在大理府趙州之白崖即武侯紀功鐵柱滇志皆載之然蔚親至鐵柱處

鐵柱空存無此七字

諸葛營

永昌府城南一土阜周三十餘丈高六尺雖遇盛潦阜隨水上下不沒俗稱武侯旗臺

九隆山

永昌府城南山有王氣武侯掘斷之

諸葛若

大理府鄧州東三十里即豪豬洞南山頂有石牆遺址下有龍潭石壁上龍形日月星辰之文人馬揮霍之狀層見叠出如雕刻然昔武侯擒孟獲於銀坑洞即此

孟獲巖

雲南府嵩明州楊林驛搖鈴山

五臺峰

點蒼山北來第三峰也漢使李平甯見有王氣掘斷之甯
雷震
死

菁華洞

大理府雲南縣八里許漢時出一鹿兩頭絕佳

風雷洞

臨安府阿迷州建甯國張氏時洞有風雷聲聞百里

天女城

雲南晉甯州晉時甯州刺史李毅女秀築

滇池神馬

晉甯州東晉孝武帝己丑太元十四年甯州守費統奏滇民董聰見池中有黑白二馬出入故老言神馬也出與馬交生駒池中日行千里按滇池周三百餘里史云源廣末狹有似倒流故曰滇滇顛也

盟誓碑

曲靖府北十五里大理國段思平與二十七蠻部會盟於

此地

萬箭樹

永昌府哀牢山北段氏因濮蠻出沒於此射其樹以厭之

箭鏃如蝟

石乳崖

點蒼山蓮花峯下芒湧溪上有滴乳石大理國段氏時高智昇初生其父棄之於此石滴乳於口得不死遂復收育之

德江城

楚雄府城西北二里後理國殿正淳時封高明亮於此後
高量成讓相位居之人化其德故名城曰德江

東西河

雲南府省城外元雲南行省平章政事賽典赤所開東名
曰金汁河西名曰銀汁河

咸陽王墓

雲南府省城東五里賽典赤治滇有功封咸陽王

元梁王宮

雲南府省城東即今之長春觀一云即今布政司署譙樓猶其故築

雲南府省城北七里廕穀昌縣一名宜蘭城之旁梁王築

梁王避暑宮

雲南府省城西三十里太華山之右羅漢寺舊華亭寺

白塔

雲南府省城外東三里通衢中東嶽廟前乃元時萬慶寺

塔

元段平章墓

大理府城北門外崇聖一名三塔寺寺旁平章段功也

梁王墓

雲南府省城外進耳山梁王把匝刺瓦爾密之墓

溫泉

雲南府安甯州城外水色如碧玉清鑿毛髮滇中共十七泉此爲第一卽唐元宗驪山玉蓮池想亦不及也

風孔

大理府點蒼山北來第七峰也名三陽峰茂原之上風從地孔出夏月過之肌骨如冰郡之多風以此

蝶泉

大理府龍首關之南泉從石腹中湧出旁有蝴蝶花一株高丈餘夏月花開狀如蝴蝶而蝶脚之蝶與蝶復自尾相脚長垂至地亦奇觀也

天耳山

蒙化廳城北相傳凡人有計度言語雖甚秘山中便有人傳之

龍潭

麗江府西南廣十畝餘深不可測四旁草結如碑履一處則諸處皆動人或近之風雨輒至

仙人坡

臨安府通海縣菁口舖每旦有白沙印巨人跡掃之正午
不見次日如故

秀山花

通海縣秀山上有花一株如芍藥由土未能有之俗不識
其名乃呼爲白山茶

火井

臨安府阿迷州田間夜常有光投以竹木則燃

蟠坤神廟

潞江府江川縣東南十里蟠山石巖中明西平侯沐晟征
交趾至此迷路有緋衣白馬人魔騎而前從之得路北還
復見旌旗騶衛列炬千餘張樂入洞得石如人形肖像祀
之廟久廢一日廟址有馬跡大如孟平之愈多土人遂復
其廟

石人

武定州昔有仙人騎驢至此驢見石人忽驚仙人因斬之
今斷石人在焉

香水泉

武定州城南有泉春時則香土人於二三月間祭之汲水

和酒飲能療疾

惠嬭湖

武定州城西北湖方廣五里茂林嘉樹掩映其旁葉落水
面即有小青鳥啣去

神鹿

大理府點蒼山中常有之一身兩頭其形如飛喜食百草
雖草性毒者能解之無害

占農石

大理府浪穹縣城南三十里鳳羽鄉有石竅中藏一蛇見
頭則插秧早見腹則及時見尾則旱人以占農

鳳棲木

大理府趙州白崖赤水江有古樹一株天矯參雲相傳昔
曾有鳳棲其上

仙人曬丹石

大理府雲龍州舊州南七里有石高二丈周二十丈其頂
甚平每雨過有赤斑如丹砂拭之愈明

金雞石

雲龍州順盪山石窟中有白石形如雞相傳昔有石龍欲

飛聞石雞鳴遁入巖中今巖下有石龍露其半體鱗甲爪尾皆具

石觀音像

雲龍州維馬井溫泉北燕子窠絕頂有石觀音像右手拄杖南天然如刻畫

大羅城

大理府賓川州東一里俗呼軍營明孝宗弘治間掘地得碑上有大羅城三字因以名衛

禹王碑二

一在雲南府安甯州法華寺石壁上一在大理府城西南

弘聖寺

一名一塔寺

前明嘉靖間新都楊莊介公慎摹衡山岫

嶠碑并釋文刻石於此

寫韻樓龍女花

大理府城南聖應峯麓海光寺

一名蕩山寺又名感通寺

楊莊介公著

六書轉注百音處李元陽中谿侍御題額樓前有龍女花

六瓣中心有金色小如意狀滇中惟此一樹相傳昔有龍

女因聽法悟道化身爲此花云

紀事

明太祖甲子洪武十七年遷中土大姓以實雲南是年雲南始開貢十八年十二月平緬宣慰使思倫寇景東二十年思倫復犯景東西平侯沐英討之自楚雄至景東每百里置一營率兵屯糧以備蠻寇二十一年正月命穎國公傅友德統番漢大軍征勦雲南諸蠻思倫入寇結砦於摩沙勒今元江府新平縣地犯他郎沐英命都指揮甯正平之三月思倫復舉衆二十萬戰衆百餘寇定邊沐英自將精銳二萬人往討之凡十五日方抵其營遣都督馮誠以輕騎三百挑之賊驅萬人乘三十餘象來戰誠殺賊數百人獲一象

而回英曰吾知賊不足破也乃下令多置火銃神機箭分將士爲三行彼象進則前行之銃箭齊發若象未退則第二行之銃箭繼之第三行又繼之象必反走然後以大軍乘之約束既定明旦賊巢驅百象來戰衆皆披甲背負箭樓若欄楯然兩旁夾大竹筒置鏢鎗其中英命馮誠居前甯正居左湯昭居右兩陣旣交象爲前列官軍火箭銃礮連發山谷震動渠帥刀斯郎斯郎理中箭死象背象皆反走酋昔刺者有勇力殊死戰英登高望之左師少却命左右取帥首來左帥遙見一人拔刀飛騎而下麾衆復前塵

戰移時賊大敗斬首三萬餘級生擒七十四象餘象皆死
諸蠻屍相枕籍思倫遁去五月都督張銓以從征東川蠻
有功封永甯侯子孫世襲指揮使九月傅友德等討越州
土目阿資於普安沐英遣都督甯正以兵從斬其渠滿巴
青生擒一千三百餘人阿資降二十三年十一月思倫降
仍命為平緬宣慰使二十五年四月命都督聶緯討建昌
叛酋月魯帖木兒五月都督俞通淵平蠻回京進封越駕
侯賜鐵券世襲六月西平侯沐英卒上哭之慟輟視朝親
製文遣使祭之追封黔甯王諡昭靖配享太廟仍肖像於

功臣廟英以哭懿文太子過哀失聲嘔血遂得疾而卒年

四十七詔以其喪歸葬江南之觀音山蔚按英五子一子

平侯繼鎮雲南卒諡惠襄年二十六無子弟晟嗣征交趾
功封黔國公洪熙時加太傅正統四年討麓川叛酋思任
因部將方政失律自引罪飲藥卒年七十二後追封定遠
王諡忠敬子斌幼弟昂佩印代鎮與靖遠伯王驥討麓川
平之卒年六十七贈定遠伯諡武襄斌襲封黔國公卒五
十一諡榮康子琮幼以姪璘嗣之卒弟璣代鎮十五年而
琮始襲黔國公卒年四十七諡武僖無子以璣之孫都指
揮誠之子崑嗣朝議以崑為西平侯之裔孫當從侯爵守
臣爭之謂南人知黔國公侯之恐為所輕於是崑年十四
拜公爵卒年四十諡莊襄子紹勳襲卒諡端靖子朝輔襲
卒諡恭僖弟朝弼襲弼不守法度屢拒王命隆慶六年詔
削其爵逮入南京錮於西平故第幽死以其子昌祚襲卒
年七十子獻被論除名以獻子啟元襲暴卒子天
波襲死於緬甸年四十三世絕共傳一十六代

昌土官月魯帖木兒叛命涼國公藍玉越巂侯俞通淵將
兵討之至遣百戶毛海誘致月魯帖木兒檻送京師遂於
邛州置越巂鎮築城守其地二十六年癸酉雲南始赴
應天鄉試二十七年甲戌雲南始中進士二十八年鎮守
雲南西平侯沐春討越州叛酋阿資斬之諸蠻震服三十
年九月麓川蠻刀幹孟叛遂宣慰使思倫倫奔愬京師詔
沐春爲征南大將軍何福徐凱爲左右副討之三十二年
二月刀幹孟請入貢五月沐春進兵擊麓川先以兵送思
倫於金齒使人諭刀幹孟不從乃遣何福等直搗南甸破

景罕若復擊崆峒砦孟乞降上以其反覆不許何福遂擒
孟新之思倫還麓川悉定九月西平侯沐春卒弟晟嗣成
祖癸未永樂元年封汝南王朱有勳於大理成祖之姪也
丙戌四年七月命成國公朱能佩征南大將軍印西平侯
沐晟爲左副將軍新城侯張輔爲右副將軍率豐城侯李
彬甯陽伯陳旭等二十五將兵部尚書劉儵叅軍務發兵
討安南篡臣黎季犛命沐晟由雲南臨安府蒙自縣入朱
能等由廣西思明府憑祥州入先是安南王陳日焜爲其
臣黎季犛所弑犛上表竄姓名詐稱陳氏絕嗣求署國事

踰年曰焜之孫天平至京愬實上遣使詰問犛卑辭乞請
天平還國上遣廣西都督黃中等送天平歸犛伏兵殺天
平中等引還上怒故有是命是年征八百降之雲南大小
古刺王潑的那浪等來貢詔立宣慰長官司先是朝命中
官楊瑄與雲南千戶孟景賢詔諭諸夷古刺因而朝貢丁
亥五年五月沐晟張輔等平安南擒黎季澄黎澄黎蒼黎
丙黎季獵等餘眾悉降得郡四十八縣百八十六戶三百
十一萬五千九百六月改安南爲交趾命督餉尚書黃福
兼管布按二司事都督僉事呂毅掌都使司事分十七府

曰交州北江諒江三江建平新安建昌奉化清化宣化太
原鎮蠻諒山新平義安順化升華州五曰宣化嘉興歸北
廣威演州統諸州縣六年二月張輔沐晟等振旅還京上
交趾地圖東西一千七百六十里南北二千八百里建設
軍民大小衙門四百七十有二七月論平交趾功進張輔
英國公沐晟黔國公八月交趾蠻簡定反定爲陳氏故官
不臣黎民從軍下安南有功後逃去其黨推爲日南王僭
元興慶十二月沐晟率師與簡定戰於生厥江敗績兵部
尚書劉儁等死之上命張輔充總兵官清遠侯王友爲副

率師二十萬徃征之七年八月張輔與沐晟合兵討之
至交趾獲簡定檻送京師陳季擴遁去時簡定稱上皇立
季擴爲天越皇帝僭元重光擴蠻人自言陳氏後九年正
月命張輔復徃交趾會同黔國公沐晟討捕叛寇雲南始
開科取士十一年十二月張輔等敗賊於愛子江十二年
正月沐晟等至老撾三關獲陳季擴八月伏誅十三年四
月命張輔鎮守交趾仁宗乙巳洪熙元年徙汝南王有勳
於湖廣武岡州爲岷王宣宗丙午宣德元年定雲南取土
中二十名十二月命沐晟爲征南將軍同安遠侯柳升等

由雲南分道進討交趾叛賊黎利二年命禮部侍郎李琦
工部侍郎羅汝敬等册封陳暲爲安南國王五年八月安
南黎利篡陳暲而自立六年六月遣禮部右侍郎章敞通
政使徐琦齎詔命安南頭目黎利權署國事七年八月土
官刀之雅奏波刷國屢侵請兵討之帝曰遠夷不可勞中
國必兩有不是降詔諭解英宗丁巳正統二年麓川宣慰
使思任叛二年思侵掠騰衝南甸等處上遣刑部主事楊
甯徃諭不聽四年五月黔國公沐晟奉命討思任都督方
政違晟節制渡江陷沒上遣使責狀晟曰吾主將失律喪
南詔野史

師罪當死至楚雄飲藥而卒五年廣西府儂人沙人叛沐
昂平之六年正月命定西伯蔣貴征麓川兵部尚書王驥
提督軍務十一月蔣貴王驥進至金齒分兵爲三道夾攻
上江因風縱火焚其營壘斬首五萬餘級賊敗走保險官
軍深入破連環七砦於杉木籠山又破其象陣於馬鞍山
之陰賊死傷者十餘萬思任遁去緬甸王驥移兵討韋郎
羅郎羅者僞廣新王維摩賊也聞王尚書大兵且至賊黨
潰散郎羅走安南驥檄安南追賊安南人懼斬其首並縛
其妻子來獻七年三月麓川班師回京論功封蔣貴定西

侯王驥靖遠伯侯璉錫用俱轉侍郎十月復命王驥蔣貴
征麓川緬甸思任遁俘其妻子而還九年緬甸匿思任十
年築騰衝城十三年王驥敗麓川賊於孟養十四年四月
王驥擒叛苗蠱富檻送京師伏誅景帝景泰三年王驥賞
緬甸孟養地緬人喜乃擒思任妻子時思任已死并斬其
首以獻四年定雲南取土比舊加十名每科額中三十名
憲宗成化十二年雲南鎮守太監錢能差指揮郭英由小
路入交趾求索安南驚駭英回以兵尾之事聞於朝命王
恕撫鎮捕英英投井死恕在鎮月餘疏二十上時錢能有

南詔里史
錦背鸚鵡織金絲八寶籠欲進上怒遣人借觀開籠放去
恐後取求擾民耳十五年巨津州白石山一日中裂半入
於江水溢田廬時屢有邊警孝宗弘治十三年滇三十六
處同日地震命刑部侍郎樊瑩祭境內山川考察文武去
官一千二百五十八員雲南鎮軍叛先是撫臣張誥浚元
賽典赤所開東西二河用省城六衛軍因給月糧稍遲眾
軍譁於撫衙前時有勢豪因宿忿駕言是鄉宦進士韓昂
阻糧眾軍入昂家須臾屋無片瓦以激變論下昂父子於
獄合家冤死十餘人招安畢誅首叛白清等數人而已十

六年春真院騰蛟起鳳額大風吹去十餘里山上麥移下
山時巨津州邊報甚急十八年滇大震遣禮部郎中陳崧
祭滇山川武宗正德九年滇大震世宗嘉靖二年緬夷火
燒齋金牌宮七年冬尋甸土舍安銓叛先是知府馬性魯
因徵糧禁銓妻鳳氏於獄裸撻之銓聚眾奪妻襲入府城
又構武定土舍鳳朝文陷嵩明楊林阻木密間攻馬龍等
處直趨省城藝西北門軍民市舍勢甚張朝命兵部尚書
伍文定往討文定至滇銓已就擒十六年因貴州分科雲
南取士定中四十名

蔚按後於萬曆間撫臣
鄒應龍奏准加五名

安南國奏稱

貢使不通由莫登庸謀爲不軌阻截道路請討之上遣使
覆勘雲南巡撫汪文盛與黔國公沐朝輔募南蠻刀鮮詢
察莫登庸情罪虛實獲其謀者阮景等八人僞印壹顆僞
大誥一册奏聞上曰登庸篡立僞作大誥罪在不赦其議
討之文盛等以臨安府蒙自縣境外其地名交岡即交趾
守臣武文淵所在於是移文查勘交趾叛逆原由據文淵
回文云安南國威勇推忠功臣特進輔國大將軍行宣光
都督使司總兵慶陽侯武文淵謹具呈狀爲勘查事竊請
十六年二月下旬文淵奉見天朝臨安府大官帖文一道

查勘安南叛逆事由仍示文淵禍福之理向化之方不勝
喜懼恭惟皇帝爺爺陛下尊居九五正位萬方體天地之
心正綱常之道故大官有是帖也文淵敢不悉陳彼莫登
庸者海濱之子祖父以捕魚爲業并弟莫樞前國王黎瑠
錄而用之國王去世國人立黎椅爲王年號光紹登庸謀
爲不軌遂而醜之復立光紹弟黎椿爲王未五年又弑之
暴王屍於棺外篡其位僞號明德未三年兄弟相爭殺其
弟莫樞傳子方瀛改號大正凡八年退於海濱方瀛居龍
編城篡位弑主事益如此本國忠義舊臣如鄭維駿保護

光紹之子黎樞守清化城鄭嶠鄭曉守太原路阮金守義
安路阮仁庶守廣南路義存故主各提兵靖難職此故也
伏乞大官體朝廷德意奉詞伐罪脩將前項事由陳奏亦
安南服也至於山川道路難易若石龍關至歸化府五百
里山路崎嶇歸化至龍編城路頗平坦諒山府至龍編城
六百里俱大路西安府至龍編城一千里崎嶇難行安邦
水洋海道難渡道理悉在天朝版圖不必再言惟念登庸
父子之奸浮於莽惡南土人民殆甚奏詩文淵祇承本國
出領宣光深有益於天朝恭惟皇帝兪命陛下德廣亨屯

量洪極渙奮武周伐罪之舉嚴人臣篡弒之誅文淵求以
報國願為鄉道勦除逆庸正名分之乖違拯生民之塗炭
內安外撫遐邇共仰於德威大畏小懷蠻貊均霑夫德教
謹具呈狀伏祈鑒照十八年朝命咸甯侯仇鸞兵部尚書
毛伯溫統兵伐安南十九年安南莫登庸降二十年莫登
庸降表至京詔改安南國為安南都統使司賜從二品銀
印尉按安南自黎利復反之後遂為羈縻之國利死子麟
立麟死子濬立濬為庶兄琮所弒琮立黎壽域等殺之
立濬弟灝灝死子暉立暉死子敬立敬死弟暄立阮神殺
暄立灝庶子暘暘多行不義鄭力時時凌波而飛持劍下
刺魚得巨魚呼謀為樂仕諱封武川伯總水陸諸營尋進

太傅仁國公銷九鼎為兵器自稱興安王謀殺護國其宮
 護走清化登庸乃立護弟應又弒應而自立嘉靖九年九
 月護死國人立其子甯登庸襲甯甯走老撾登庸以子方
 瀛為大王元僭大正及官軍進討方瀛乃移文雲南鎮臣
 言黎應病篤詔方瀛入宮付邸章命主國事甯乃亂臣阮
 塗之子冒黎姓非護子也朝廷知其奸偽決意討之時方
 瀛已死登庸留其孫福海守國與姪莫文明頭目阮如桂
 等四十餘人於嘉靖十九年十一月初三日入關各跣足
 繫脛詣軍門稽首獻所部土地軍民籍還所侵欽州四峒
 境土請奉正朔毛伯温等遂宣說朝廷威德稱制赦之二
 十年四月莫登庸降表至京詔改安南國為安南都統使
 司以莫登庸為安南都統使子孫世襲後至萬曆間黎氏
 復立莫氏竄居高平以黎維潭為都統使相侵害升菴紀事至此
 莫敬用為高平令世守朝貢毋而終

續紀事

嘉靖三十年元江十舍那鑑殺姪奪印戕殺布政使
 乃江西名儒朝命撫臣石簡討平之三十六年替甸通火
 李向陽等以徵糧太急為辭遂聚眾并糾易門夷以叛號
 為混天大王尋即削平之三十九年省城無賴段賜等謀
 叛賜先以罷吏禁獄久之自稱段平章之後糾合惡少三
 十六人倣宋時淮南盜宋江作亂事露收捕之四十二年
 武定鳳繼祖叛先是官府邱士婦瞿氏平老男婦索氏當
 繼領府事因得罪瞿氏瞿氏遂謀奪邱與族姪繼祖因而
 仇殺爭官撫滇臣命分守左叅政陳善往理繼祖抗命據

府叛旁掠民羅次糾東川夷酋攻曲靖尋甸所至搔動
分守僉事張澤統兵進勦土舍阿方通賊斷浮橋絕王師
歸路澤兵敗不屈死之事聞於朝命巡撫呂光海鎮守沐
朝弼討之擒繼祖誅之改土設流同時死事招安生員楊
忠等惜未卹錄穆宗壬申隆慶六年隴州岳鳳叛鳳以逃
民爲隴目把久之謀奪主印陰誘莽寇三宣六慰三宣者
甸千六慰者緬甸孟養八
百大甸車里木邦老撾也起官司屢撫之不聽神宗癸
酉萬曆元年巡撫鄒應龍討鐵索箐今楚雄府姚
州所屬之地赤石崖
今大理府賓
川州所屬地諸叛夷平之九年岳鳳犯姚關在永昌府時
南二百里

彗星見西南方光芒燭天識者以爲兵象十年春日無光
月赤如日夜無星辰晝迷煙霧數日方開十一年朝命騰
越遊擊劉綎永昌叅將鄧子龍討岳鳳時師宗州守蜀人
何珏常破蜀九絲岩立功有膽畧乃單騎入賊巢諭以威
德鎮撫司道協力擣勦遂擒岳鳳父子并土舍罕虔三宣
六慰悉平奏捷論功鎮守黔國公沐昌祚陞太保賜一品
服撫臣劉世曾陞侍郎賜一品服各蔭一子司道府牧令
等官各賚銀緞有差劉綎鄧子龍俱陞副總兵官奏捷露
布曰雲南遊擊將軍署都指揮僉事劉綎爲仰仗天威蕩

平巨寇恢復三宣六慰傳露布以報大捷事伏以皇靈不
振恩威暨及於邊陲天命維新聲教訖通於荒服幸膚功
之克奏占景運之重熙逆夷岳鳳等原以土司部落冀草
賤夫狐媚欺孤謀主奪印雄吞六慰威劫三宣馴至結連
逆黨蠶食諸夷遂爾勾引莽酋憑陵中夏上年謀殺官軍
肆無忌憚近今侵犯內地實屬伺窺蓋謂騰越永昌皆彼
坵隴所在碧雞金馬亦其桑梓故墟是以蜂屯蟻聚謀爲
不減輒敢鴟笑鴞張志非在小憑孽狐之坵跳梁跋扈恃
狡兔之穴踰伏偷安以爲威弧不射容知天網莫逃本職
極則賑貸之以固騰永之門戶切雲霓之思者望風而嚮
應避水火之厄者禴負而爭先當鋤強戡暴之威存問死
卹傷之惠試兵甫及二月犁庭爲之一空遂使海濱梟雄
咸謂天威莫測遐陬童叟共歌聖壽無疆但念疆宇雖已
廓清莽酋猶然肆大若不亟加勦滅終爲禍根蔓延際可
乘之時而經畧譬若建瓴假彈壓之威以剪除勢如破竹
卽於甲申年二月十一日糾合諸夷軟血剖符定縱連橫
合營進討蓋雖不殺致殺實則以夷功夷財不費而國勢
愈張師不煩而軍聲益振共集堂堂之陣用成赫赫之功

侯蕩平之後另圖改土設流於平定之餘更宜築關建堡設大將旗鼓以控制要衝立諸司衙門而相爲犄角隨行屯田之策以足食而財可使富保障堅於未形又練土著之丁以足兵而力可使強么麼庶幾無患由是雨霽雲開見隴樹蒼山之色風清亭靜斷羌絃番管之聲而滇南之安永保萬世無虞矣地方幸甚國家幸甚敬馳露布以聞萬曆十三年三月十六日奉旨岳鳳罕虔等解赴京八百車里八百夷以犀象方物來貢是月岳鳳等解至京禮兵二部奏請獻俘告廟其獻俘儀注內開云禮部儀制清吏司爲仰仗天威計擒元惡恢復疆土恭報西南蕩平以抒聖懷事奉本部連送該本部題本司案呈奉本部送先准兵部咨稱雲南鎮撫等官沐昌祚劉世曾等恭報節次擒斬逆犯首級二千一百三十八名顆及逆賊岳鳳父子等五名續添莽糜啞晏得皮一名押解到京乞擇日祭告郊廟宣捷獻俘等因題奉欽依移咨前來該本部照例題請於本月二十九日早遣官祭告郊廟是日御前宣奏捷音百官吉服致辭稱賀獻俘另行擇日具儀題請等因奉聖旨是祭告南郊遣官徐文璧北郊朱邱貞太廟駙馬侯拱

宸各行禮等因欽此欽遵隨行准欽天監手本擇到本年九月初一日辰時吉獻俘等因到司案呈到部臣等謹將獻俘合行儀注開呈上請伏乞聖裁等因萬曆十三年八月二十三日本部尚書兼翰林院學士王等具題二十五日奉聖旨是欽此欽遵擬合通行爲此合就送該司卽行該衙門欽遵施行一前期禮部告示文武百官俱朝服詣午門前行慶賀禮先一日內官設御座於午門樓前楹正中是日早錦衣衛設儀杖於午門前御道之東西教坊司陳大樂於御道之東南西北鴻臚寺設贊禮二人於午門前東西相向設文武官及諸藩使人等待立位於樓前御道南又東武西相向及刑部獻俘官位於午門前御道東稍南西向設獻俘將校立於午門前御道西稍南東向引禮引文武官東西序立獻俘將校引俘列於午門前西邊武班之後上常服御皇極門鳴鐘聲止鴻臚寺跪奏上乘輿樂作至午門樓上升座樂止鳴鞭訖鴻臚寺官宣奏畢贊獻俘將校引俘至獻俘位北向立俘跪於將校之前刑部官詣樓前中道跪奏云具官臣某奏某官以某處所俘獻請付所司候旨傳下刑部官領旨訖卽同將校押出施

行文武百官入班北向立唱排班班齊致辭官詣中道跪
致辭稱賀訖贊鞠躬樂作五拜三叩頭興樂止鴻臚寺官
跪奏禮畢駕興樂作百官以次退三十五年十一月武定
土酋阿克率鄭舉等作亂直抵省城城外坊市悉被焚劫
索各官印信而去還攻元謀和曲諸城未及一月陷一府
三州四縣尋甸叛目亦應之陷嵩明福楊林官軍拒却之
還攻尋甸陷祿豐官軍四面合擊追至東川盡擒其黨收
回各官印信四十八年雲龍州土知州段嘉龍爲其族人
段進忠所殺殘裂肢體謀襲其職剽掠無忌大肆猖獗巡
撫沈做煇授計於分守金滄道彭自新瀾滄兵備道熊鳴
岐密擒之會進忠僞託赴訴由永平間道驟抵大理擁衛
逆眾逼龍尾關而陣名待命而彭自新熊鳴岐等分佈早
定遂命薛中軍周陳二指揮突陣擒斬之釋其脇從事平
改土設流官知州熹宗甲子天啟四年阿昌一名夷林養
中作亂雲龍州知州周憲章計捕斬之先是萬曆四十八
年段進忠之亂養中防護瀾滄渡蘇溪舖等處戰甚力養
中魁梧猛鷲有力善弩可敵百人進忠平後養中恃其勇
力漸露跋扈據官田不納賦結賊黨時出剽掠憲章諭散

其黨擒其弟林養節殺之養中遂逃遁潞江外之茶山野
人境內日治兵招集夷黨潛圖襲州治變聞當路檄收其
父兄妻妾禁之憲章曰賊忍復安知有父兄獨念其妻妾
耳乃釋其妻李氏妾女息使甯家而密購其鄰右等令潛
伺養中歸而擒之養中果眷戀其妾暗招之女息三往而
三阻於熊虎不得達養中遂於三月十三日暮夜潛回至
妾所欲裏糧挾妾去而憲章所購其鄰右李正芳李直設
紹言喇武等已知之十四日黎明急令人報憲章而各藏
兵器密布其屋之四周先令敢勇者段早成人其家牽制
之女息見早成人大呼養中挺刃出早成遽以木叉扼其
頸挂之壁間欲生得之養中刃斷其义所早成削左耳露
骨於是段紹言率喇武並進養中方欲張弩和言挺格落
之養中復刃傷紹言左臂喇武急奮刃前斫之中養中要
害路之地乃斬其首以獻憲章釋其脇從之黨亂遂定

國朝大清世祖章皇帝丙戌順治三年冬十二月安南土酋
沙定洲叛陷省城黔國公沐天波奔楚雄賊攻楚雄城不
下遣其黨王朔寇大理回民與之暗通由東門水洞入城
遂陷先是阿迷州土酋普名聲叛各聲死其妻萬氏納安

南土司沙定海不能厭其欲殺之納其弟定洲會黔國
公沐天波調定洲討元謀叛酋吾必奎洲逗遛不進及賊
平洲始至天波檄止之不聽以兵屯省城闕天波府饒富
心動一日託言辭歸入天波府遽襲之天波急出西門士
民見變起倉卒遂擁護陳太夫人走城北普吉村之朝陽
菴焦夫人走金井菴避之兩夫人慮被辱是夜俱自焚死
天波奔楚雄洲圍之城不下乃別遣其黨王朔寇陷大理
死者至七千餘人丁亥四年四月流寇孫可望李定國劉
文秀艾能奇等入滇沙定洲遁走八月孫可望等兵破安

甯進祿豐分守金滄道楊畏知拒之祿豐獅子口戰於啟
明橋兵敗被執可望遂鼓行而西據大理城畏知不屈欲
死可望慰留之畏知挾可望令無焚擄淫戮可望悉從之
可望自稱平東王畏知力爭乃去王號稱將軍辛卯八年
五月前明分守金滄道楊畏知罵賊死己亥十六年

世祖命大將軍信郡王鐸尼伐雲南同平西王吳三桂西討
諸郡軍屯大理龍尾關大理納款撤軍

附明楊莊介公升菴滇南月節詞十二闕調寄漁家傲

正月滇南春色早山茶樹樹齊開了艷李夫桃都壓倒粧

點好園林處處紅雲島 彩架鞦韆騎巷依水絲寶料銀

毬小誤馬隨車 天欲曉燈月皎潔雞三唱星回卯蔚按巷

疑巷字 或有誤

二月滇南春燕 婉美人來去春江暖碧玉泉頭無近遠香

逕軟遊絲搖曳 楊花轉 沾酒寶釵銀釧滿尋芳爭占新

亭館夷下艷詞 歌纂纂春日短溫柔鄉裡無來晚

三月滇南遊賞 競牡丹芍藥晨粧竟六華亭芳

館釘羅天錦地 歌聲應 陌上柳昏花未青千里燈

相映繁舞塵香風已定 沉醉醒提壺又喚朝興

四月滇南春逸 運盈盈樓上新粧洗 八節常如三月裏花

似綺斂頭無日無花藥 杏子單衫鴉色髻共傾浴佛金

盆水拜願靈山催早起爭乞嗣珠絲 先報鈿梁喜

五月滇南煙景別清涼 國裡無煩熱 雙鶴橋邊人賣雪水

梳啜調梅點蜜和瓊屑 十里湖光晴洗牒江魚海菜鱸

刀切船尾浪花風捲葉涼意快遊仙 繞夢蓬萊闕

六月滇南波浪渚水雲鄉裏無煩暑 東寺雲生西寺雨奇

峯吐水椿斷處餘霞補滇人謂虹為水椿 松炬熒熒宵作午星回

令節傳今古玉傘雞縱初薦祖荷菱 浦蘭舟桂楫喧簫鼓

七月滇南秋已透碧雞金馬新山瘦擺渡村西南壩口船

放溜松花水發黃昏後七夕人家衣暴袖彩雲新月佳

期又院院燈燈如白晝風弄袖刺桐花底仙裙皺

八月滇南秋可愛紅芳碧樹花仍在茵圃全無搖落態春

莫賽玫瑰綠縷金針鈔屈指申秋餐沈濯遺琴遠日天

澄派七寶合成銀世界添興快涼箱款月勝清籟

九月滇南籬菊秀銀香玉露香盈手百種千名殊未有搖

落後橙黃橘綠為三友摘得金英來汎酒西山爽氣當窓

脯鬢挿茱萸歌獻壽君醉否水昌宮裏過重九

十月滇南樓暖屋明牕巧釘迎東旭酒也唾魯麻麩也香春瓮

款歌一曲酥花乳線浮杯綠蜀錦莫綾熏夜馥洞房窈

窕懸燈宿掃雪烹茶人似玉風弄竹霜天曉角寒生粟

冬月滇南雲護野曹溪寺裡梅花也綠萼黃須香趁馬携

翠竿墻頭沾酒橋頭濕江上鳴蟾初凍夜漁簑句好莫

堪畫青女素娥紛欲下銀霞灑玉鱗皺遍鴛鴦瓦

臘月滇南娛歲晏家家餌塊雕盤薦雞骨香馨火未燄栢

榔串紅潮醉類櫻桃綻苔翠瓊瑜開夜讌百夷枕粲文

衾爛醉寫宜春情興懶粧閣辭屠蘇已識春風面

題大理懷古

南詔野史訂正訖因題大理
詠懷古跡二首於其簡末

胡蔚美

邪龍鶴拓事荒微遜國蠻風見亦希
地上赤文符自現柱

頭金縷鳥能飛九隆浮木神先命三
詔明樓骨不歸皮邏閣焚

明樓越析詔未至遼賅詔骨已携歸
詔施浪詔蒙舍詔骨皆成灰燼故止云三詔

啟侮萬人塚草沒煙霏

其二

陽劍山河戰伐申神川功業儘英雄
當時自識尊唐統後
代誰能繼祖風三塔妙因成獨外五臺王氣鑿先窮十三
傳絕紛乘竊白段天教與宋終

南詔野史書後

南詔野史凡五本一曰倪本昆明倪輅撰明史藝文志雜

史類載之凡一卷二曰楊本嘉靖二十九年新都楊慎據

倪本而薈萃成編卽乾隆四十年胡蔚據以訂正者按姜午生

跋云用修游滇原其世系著為載記阮霞嶼惜其佚脫更
讐之以付劊劊考升菴滇載記本于玄峯年運志且載記
非野史姜跋甚明四庫提要謂阮偽託升菴而不知阮僅
據升菴載記而成野史並未卽以野史託之升菴故卷首
僅曰倪輅輯楊慎標目而元聲則自曰刪潤也乃不料阮
本有升庵標目之名世遂謂升庵有作野史之事胡本遂
竟削阮名直題之曰楊慎編輯且序之曰升庵先生之野
史類多志乘所遺蒙段九姓竊土僭號始末尤詳誤阮為
楊斯失之矣胡本流傳最廣遂使承學之士無不以南詔
野史為楊作阮書之晦固不幸矣楊著書萬卷亦豈以此

書之顯為幸耶特升庵序輅之野史原
有蒼萃成編之語今不妨別為楊本耳
三曰阮本馬龍阮

元聲據倪楊本而刪潤之
四庫存目于史部載記

類阮本亦有二姜午生所跋之本始于沙壹四
提要曰元

聲偽作所謂倪輅楊慎皆依託也
按提要之言殊太武斷明史志原有倪輅南詔

野史一卷何得一筆抹
之而謂皆元聲依託乎
四曰胡本武陵胡蔚據楊本而訂

正之分上下卷即今單行之本
五曰王本浪穹王崧得阮

本之傳鈔者數本而參互攷訂
勒為一編刊入雲南備徵

志者樂山先生輯備徵志在道光十一年胡本入刻何今
以未見刻本且無一字及于胡本豈不重其書耶

所傳惟胡本王本而王本最足徵信
蓋樂山通才釐然次

第凡錯簡者注而正之
亦有未注而正之者如馮都督經

于淵海詩之前古蹟中孔廟南詔不知尊孔子以王逸少為聖人本於元史張立道傳為王疇五先生所駁亦未訂

正
始于星野終于萬歷十三年與四庫存目之本合倪本

蒼萃于楊楊本刪潤于阮阮本得王之參互攷訂
差幸無

憾光緒庚辰滇刻野史竟不取王本而取胡本王本之流

傳遂不如胡本之廣噫異已夫胡本亦有所長
二十七蠻

部一條六十種人一條足補阮本之闕一也
續紀事一篇

文雖淺穉紀明季滇事頗詳二也
除新增各條之外大都

本阮氏舊文綱舉目張修飾潤色
詩詞敘記歸于雅飭三

也要其失處亦可畧言卷首始南詔之稱不始星野徒淆
古本何關宏惜古蹟增三十餘條而不明言其所增禹王
碑一條云明新都楊莊介公慎慕岫嶺碑并釋文刻石於
此寫韻樓一條云莊介公著六書轉註古音處李申谿侍
御題額胡既題曰楊慎編輯豈升庵以己之蹟爲古蹟乎
紀事一篇原本卽合于歷代源流以下別爲一篇亦殊無
謂卷末附升庵月節詞已爲蛇足又附刊己作之大理懷
古二律不尤乖著書之體乎嗟乎萬里雄封開闢歷數千
載堯典禹貢姑勿附會卽以史記兩漢華陽志唐書元明
史而論一方文獻巍然煥然茲之野史自不可以嚴而繩
顧輕爲增竄不加別白沿謬襲訛恐上誣古人下誤後學
雖沙中有金無從披揀亦可傷也今一一辨其得失如右
後之讀野史者庶有以知源流而別涇渭歟丙辰花朝石
屏袁嘉穀

邵陽莊介公

公

Vertical columns of text, including the name 邵陽莊介公, with some characters appearing faint or obscured by ink bleed-through from the reverse side.

